

Salba Urirama: Segun Arnold ranse di TNO

Molinnan di biento ta un ‘dying elephant’

ORANJESTAD – Recientemente representantenan di Salba Urirama a biaha pa Hulanda pa asina atende reunionnan cu expertonan y lidernan Hulandes riba e asunto di proyecto di parke di molina industrial na Urirama. Un biahe cu e wordo haci riba nan propio iniciativa y costo, y e meta ta pa ‘Salba Urirama’.

POLITICONAN HULANDES

Segun Sr. Holmo (Omni) Henriquez, habitante di e area di Urirama, el a reuni cu Voorzitter di Commissie Raad di Tweede Kamer, unda el a entrega un carta splicando e situacion di e parke di molina di biento ta bayendo na Aruba. “Incluso e manera con nos a wordo saca for di Parlamento y derechonan constitucional cu ta wordo trapa,” Sr.

Henriquez ta bisa. E carta aki tambe a bay Minister Palsterk, pa tur miembro di Eerste Kamer y di Tweede Kamer.

EXPERTONAN HULANDES

Henriquez tambe a reuni cu Ingeniero Arnold Franse di TNO (Nederlandse Organisatie voor Toegepast Natuurwetenschappelijk Onderzoek) na Delft y cu Ingeniero Frits van de Berg di GGD (Gezondheidsdienst Amsterdam) kende tambe tabata e persona cu a traha e rapport pa e proyecto di parke di molina di biento na Maastricht, como tambe e Gemeente Raadslid di Maasticht y fractievoorzitter Sra. Kitty Nuyts y Burgemeester Sr. Onno Hoes.

CONFIRMACIONAN

Henriquez ta splica cu du-

rante su bishita cu Ingeniero Arnold Franse di TNO, e Ingeniero a bis’e cu nan a stop cu proyectonan di molina di biento y no ta haciendo niun estudio mas riba nan pa motivo cu nan a comproba cu esaki no tin mas desaroyo. “E ta practicamente un ‘dying elephant’ y nan como Ingeniero no ta wak un futuro den molinnan di biento. Tambe e Ingeniero a remarca cu molinnan di biento, economicamente no ta rendabel,” Henriquez ta bisa.

“Nan di TNO ya no ta mira futuro den molina di biento y Gobierno di Aruba kier inicia esaki na Aruba pa pueblo carga e gasto akinan,” Henriquez ta remarca.

MENASA PA SALUD DI HENDE

Segun Henriquez, Ingeniero Frits van de Berg di GGD, kende a traha e rapport pa e proyecto di parke di molina di biento na Maastricht a confirma cu molinnan di biento no ta eficiente mescos cu Ingeniero Arnold Franse di TNO, e beneficionan lo ta muy poco, si no ta nada y el a confirma contundentemente cu molina di biento ta causa problema pa salud di hende dentro di un distancia di 2 kilometer. E problemanan menciona, ta strobacion di soño, migraine (dolor di cabes), nivel di stress ta subi y diferente sintoma psicologico.

“Ami cu mi casa tin dos yiu y no tin pensa pa haya mas, pero imagina bo otro habitantenan dentro di e 2 kilometer aki tin otro habitantenan cu si por sali na estado of ta sperando. Y e nuebe lunanan riba su mes por ta uno di stress, awo



Sr. Holmo (Omni) Henriquez, habitante di e area di Urirama kende recientemente a reuni cu diferente experto y lidernan Hulandes pa cu nan meta pa ‘Salba Urirama’.

si nivel di stress ta subi tambe door di e molinnan di biento, ki efecto esaki lo bay tin riba e embryo? Kico esaki ta haci pa hendenan cu ta sufri di curason?” Henriquez ta puntra, remarcando cu Gobierno no ta pensa riba esakinan.

COSTO DI MOLINA DI BIENTO

Henriquez a añadi cu Ing. van de Berg tambe a subraya cu e MER rapport no ta algo pa depende riba dje. “Mi a puntr’e tambe, e costo di un parke di molina di biento di 10 molina, altura 145 meter of mas, kende a bisa cu esaki ta core entre 3 pa 5 miyon Euro. Awo mi pregunta ta, for di unda e 250 miyon ta sali?” Henriquez ta señala. E resistentenan ta exige transparentia riba e 250 miyon aki.

SEGURO MEDICO

Gemeente Raadslid di Maasticht y fractievoorzitter Sra. Kitty Nuyts tambe a reconfirmar e informacion di Ingenieronan y tambe a bisa cu



Sr. Patrick Farro, habitante di e area di Urirama kende ta hibando e lucha contra e parke di molina di biento na Urirama.

parkenan di molina di biento ta traha a base di subsidio algo cu Henriquez ta remarca cu Gobierno di Aruba no por carga. Y e problema di salud lo indubablemente trece un peso financiero pa nos seguro medico.

PRUEBANAN CONCRETO

Segun Sr. Patrick Farro, habitante di e area di Urirama, esakinan a elimina dudanan cu kisas ainda por tabatin pero e biahe aki a trece pruebanan concreto pa Aruba, cu e proyecto aki ta un menasa pa salud di hende y no ta beneficia pais Aruba.

CONTINUACION DI LUCHA

“Desde awe cu Sr. Henriquez a yega bek cu e pruebanan aki, nos lo continua e lucha y informa pueblonan di un proyecto cu pueblo tin cu bay paga pe, cu no ta beneficia nos carter y tin su consecuenciasnan cun’e. Awe e meta a start,” asina Sr. Farro a termina bisando. □



Parke di molina di biento industrial.